

## DE UNITÂT 'E ARTICULAZION

Setenbar al vares di sei un bon mês, amancul pe vendeme culturâl e pulitiche dal Friûl. Il risultât di agns e agns di vitis, di rabiis, di inlusions e di delusions si lu sta viodint a planc a planc. Alc al sta madressint tal cjamp de Furlanie; nond'è dubiz. E alc di biel.

Cul prin dal mês finalmentri si à podût viodi il prin numar de Bibie, robe che za dîs agns a ere fantasie di cuatri esaltâz.

Si sta spietant ch'a parturissin cheste benedete o maladete leç di tutele pai grops di «antico insediamento» (viodeit vuâtris se satane no ur fâs inventâ une tristerie in dî!). Cjantâ a plene cane par une vitorie che no jè chê ch'ò smicjavin nol è il câs. O acetin ch'a vetin vude la cussiense di frontâ il berdei e di dâ amancul alc. Sinpri pronz però a sfuarçâ chê puarte che lôr le àn volude dome in sfrêse. Ma intant nissun nol dinèe ch'a esist une cuistion furlane, nancje la DC che in fat di minorancis j dà il fum ancje il cai.

Ce che nissun nol vares scrupulât, invessit, al è che, nancje a mieç an de riconferme dal dogma de unitât regjonâl, cumò si seti inviât un gjespâr di dutis lis fuarcis pulitichis ch'a disin che la regjon no à vût l'esit che si voleve, che i tins a son ganbiâz, che il Friûl nol pò sei frenât par in etemo di chêi caranpans di triestins e vie. Ma chestis robis no lis disin chêi 95.000 che àn firmade la cartuline di Onde furlane par spacâ la regjon e nancje no chêi dal melon pe part di là.

Lu disin i moroteos di Triest di une bande e il diretôr dal plui innomenât peçotâr regjonâl di cheâtre.

Che i Triestins le vetin vude sù cui furlans inmò de Constituent no jè lafè une novitât. Lôr no si son mai rassegnâz che Crist ur veti dât dome doi articui, compagn dai furlans. Lôr an volevin amancul cuatri, a cost di lâ cavaloz, Chest al sucêt cuanche si è usâz a fâsi mantignî e no si ûl capîle che dutis lis pelandis a muerin di caritât. Triest aromai no j fâs gole a dinissun e i aventôrs ch'al veve si son stufâz. E plui al vai il muart e plui al ingomèe. Cumò che la rinassite economiche si è inviade ben, ju inprenditôrs furlans a rugnin e a disin che i sudôrs e l'ingegn dai furlans e àn di restâ in Friûl e che si à di judâ di plui chêi ch'a sconbatin e ch'a produsin di plui. E jè cuistion di ritmetiche, oltri che di sintiment e di cuissiense. E alore? Spachìn la regjon.

Apene che Meloni al à tocjât il cantin, duc' e àn spiçât lis orelis, parceche cuanc'al fevele il piçul, il grant al à za fevelât. Cui ajal pocât il ginar di Tessitori a meti in forsit l'unitât regjonâl e a fevelâ di une regjon articulade, che si podares clamâle ancje «Friûl e Triest»? Lui ch'al è stât di sinpri il paladin e la plere des sieltis disgraciadis de DC?

Il moment al è biel e l'ocasion golose cence fin. Al sares di monis inludisi che ju inprenditôrs a fevelin di spacâ la regjon par amôr di patrie o che i partîz unitaris si setin convertîz par vie dal an sant. Ma al sares istessamentri di stupiz viodi dut chest passaç fenomenâl di ucêi e no prontâ lis vuiscjadis.

Editoriâl de La Patrie dal Friûl di Setembar dal 1984, n. 9